



**Uunga siunnersuut: Aatsitassanut tunngasunik suliaqarneq pillugu**

(Aatsitassanut Inatsisillu Atuutsinneqarnerannut Naalakkersuisoq)

(Siullermeerneqarnera)

Demokraatit paasivaat, una siunnersuut pingaarnertut allaffissornikkut misiliinerusoq, maannakkut Aatsitassanut inatsisip inatsisinut pingasunngorlugu aggornissaanut siunertaqartoq. Aatsitassanut tunngasunik suliaqarnermut inatsisissatut siunnersuutip uuma maani nunatsinni malittarisassat atuutereersut allanngortigaanngilai.

Taamaattorli inatsisissatut siunnersuutaavoq pingaarutilik. Allaffissornikkut suliat annertuut ingerlareerput, uumalu inatsisissap siunissami ukiorpassuarni toraangassaq aalajangertussaavaa. Taamaattumik pingaartuuvoq, aallaqqaataaniik eqqortumik iliuuseqarnissarput. Pingaartuuvorlu, qulakkiissagipput, inatsisip maannakkut atuuttumiit pitsanngoriaataanissaa.

Aatsitassanut tunngasunik suliaqarneq pillugu inatsit ilaatigut arriippallaamik ingerlanneqarnerneqartarpoq. Takusinnaasorinngilarali, uuma inatsisissatut siunnersuutip suliat arriippallaamik suliarisarnerinut aaqqiissutaanera. Taamaattumillu Naalakkersuisut ukuningga apererusuppakka siunnersuutip suliarinerata nanginneranut tunngatillugu:

-Suliniutit suut suliat sukkanerusumik sunniuteqarluarnerusumillu suliarineqarnissaanut qulakkeerneqarsimappat?

-Siunnersuutip suliarineqarneranut atasumik nunanik, eqqartorneqartumut eqaannerusumik sunniuteqarluarnerusumillu inatsiseqartunik tusaamasaasunik isumassarsiffigisaqarsimappat taamaassimappallu nunat suut?

-Naalakkersuisut uuma siunnersuutip suliarineqarneranut atasumik avataaniit siunnersorneqarnissamik ujartuisimappat taamaassimappallu kikkunnit?

Siunnersuut anneertoorejussuuvoq, taamaattumillu eqqumiiginarluni, ataatsimiititaliap suliarinissaanut piffissakinnera. Taamaattumik Demokraatit isumaqarput, appassaaneernissaa pingajussaaneernissaa UKA 2023-imut kinguartissallugu eqqarsaatigisariaqartoq pitsaassusissaa qulakkeerniarlugu Inatsisartullu siunnersuummut sunniuteqaqataanissaat qulakkeerniarlugu.

Taamatut oqaaseqaateqarluta siunnersuut Inuussutissarsiornermut- Aatsitassanullu ataatsimiititaliami oqaluuserineqaaqqinnissaanut ingerlateqqipparput.